

# Filemónurineema

## Wasina pakich kamanchinllpa yuwaa Papororini Filemónurineem yandarangu anootsi

Yuwapur ichtaru Paporoo tumanarangana anpur tputs Onísa suru Paporosh kusarangiya. Onísa upaturuna, Filemónu suru. Yaktash Kólosénush taarangiya. Filemón Isuschichimuncha tputsi. Onísa upatarunaa maachi shuchirangu, Romap suwarangiya. Anush Paporpat kapung tsiyatarangu, Isusumun mang' taturangiya. Anumunsha Romash taarangu, Paporoom ista-mapaneem kinarangiya. Paporoo kapung istarangiya. Itaru, zapish Paporsha, Paturunaripish kanapungcha, watam wand tumashtakshawa, tárangiya. Oníssa, Ayu, tárangiya. Táyaru, Paporsha kirakaa Filemónaam yandarangiya Onísa istamaama. Yandayaru, M'chachureetsish natsarinllpa, watam na Isusumun shiyaa zuwanllwi, tárangiya. Ashiriy kirakaa yandayaru, Onísash zanganirangiya. Onís Tíkikupta naatarangiya. Tíkiku Paporoo wirkari Kólosénshu-cheem tputs yarangitamta.

Ashiriya, na yuwaa kamanirangu anoo kamanchinllpa:

- A. 1-3: ¿Tamarimta? zuwaa Filemónoo.
- B. 4-7: Tputs shiyaa, zuwaa Filemónu, wanipaja wanasiri kamankana. Shiysha tputsee kapung chinaksha.
- C. 8-21: Ashiriya, m'chachureetsish Onísa nayaningcha. Na Isusoo mangoonkiya. Ashiriya, zuwanlleetsish tamaparee ashiru chinangcha.
- D. 22: Nuwaam Apanlee tsiyatangandama tumanshishush shitungamaama. Shitungachuri, shiyash napchinllpa.
- E. 23-25: Nuw ipunshi shiyaa kapung chinakanaya. Ashiriy na wapparee.

Papororini tárangiya.

---

## Papororini wirkari wamkureem Filemónurineem yandarangiya

<sup>1</sup>Zuwaa Filemónoo, ¿tamarimta, taarish?

Nuw Paportana suri. Isusumand wamin nuw tumanshishish taauri, ashiritaa na shiyaam kirakaa yandakina. Ipunshini Tímoteyu nuwapatcha taaksha. Shiyaa zuwaa Filemónu, kapung chinakaniya watam shiy iy tamaparee ashiritam Isusoo kuk uru tputsee tayapstakshawa. <sup>2</sup>¿Izari Ápiya, tamarimta shiya, izari? ¿Wanasiri taarish? ¿Tamarimta shiya, zuwaa Árikapsa, taarish? Shiy uru tayapstakitamtish Isusoo kuku. Shiyaa kapung chinaktamaniya. Zuwaa Filemónu, tputs shiyash pangish shaniykusin; Papor siyaa ichingurootsis chinaktana; áttanda Paporo; tángcha shiyshta. <sup>3</sup>Aparich, mishat iy kurakarini

Isusu siyaa wanasiri istachiya. Mangepmis mapiym panachiya, nuw siyaa atina.

<sup>4</sup>Apanllpat tsiyatkuri, uru shiyaam Apanlee Wappari tina. <sup>5</sup>Shiyamun zapan mazarangtana; Kapung Isusoo mangoonkiya. Isusoo kizpur chinakiya, áttssincha shiyaatsi. Mishat, Isuschichee zoonlleepaz ashiru kizpur chinakiya. Isusumuna uru istakiya; áttssincha shiyaatsi. <sup>6</sup>Ashiriya, nuw shiyaam Apanllpat tsiyatkuri; Zuwanlee Filemónu istangcha shiyaa kukish itsinsaru tayapstamaama; atina. Watam tayapstakush, Isusoo aranginasha mangoonachpasha. Yuwaa Isu iyaa kapung istarangu izuuru mangoonachpasha. <sup>7</sup>Yuwamand shiy tputsee kapung chinakish anumand mangi kisa. Uru Isuschichee istaksha.

Tputseetstam mang' yaramaama uru tsi-yataksha. Ashiri nuwsha anoo mazinara-nguri, nuw mangi kсарangina.

**Ashiriya, zuwanlee, na pakich shiyaa táchinllpa**

<sup>8</sup>Nuw Isusoo tayaspatampantaati, itaru ashtaa shiyaa kamachtamaam ngatkina. Ashiri ngutariti táchinllpa. <sup>9</sup>Watam zuwanll Filemónu nuwaa china-kuwa. Ashiriya, nuwaa kuki mazinach-paree, atina. Nuw shiyaa amikurtana. Na nuw wachinayaruri, Isusumand kuk nuwaa tumanaranganaya. <sup>10</sup>Ashiriya, zuwanlee, nuwaa kuki mazinangcha. M'chuchureetsish Onísaa nayaningcha. Nuwash kusarangu, nish tumanshi-shush nuwapat taakiya. Nuwaanaatsi ipari tamapari ashiru kizpur chinakina. Nuw Isusoo kuk Onísaa tayapstaranguri, na uwsha Isusoo mangoonkiya. Isusumun mang' tatkiya. Onísaa shiy m'chachurimuntishcha; kurikriptish Onísaa paxanxarangtishcha. <sup>11</sup>Itaru, nda kaapana shiyaam tarawaztarangiya. Mingas ashiru taarangiya. Sheeru suwaryu, nuwashsha zapish kusarangiya. Na nuwaa kapung istakiya. Natunaa shiyaa istachshaparee.

<sup>12-13</sup>Nuw kizpuritaa chinaki, itaru shiyap waptam tuwanpuchinllpa. Nuw Isusumun kuk nish tumanshishush taaki, Nuwaa istapanda átana. Nishuri taakinaariya shiy tamapsha ashiritam nuwaa istachparee, itaru watam shiyaa mashimaam pinasakinawa. Ashiriya, na waptam shiyap zanganchinllpa. <sup>14</sup>Shiy m'chuchurtishcha, ashiri nuwna pachind-keeki. Shaantari Paporoo istapi átush, ashiriya istangandama. ¿Itaru, tamari shiyaa m'chuchurish izuuru yamachi? Ashiriya, tuwanpuchinllpa. <sup>15</sup>Onís shiyash suwarangu, na pakchimari nuwash taariya. Itaru, shiyap kanapkachu, uru shiyapat taachparee. <sup>16</sup>Ndatuma suwachu, m'chuchurish taarangiya. Itaru, na Isusumun zuwanllshatishcha. Ashiri shiysha zuwanlleetsish tamapari ashisha chinachsha. Nuw Onísaa kapung china-



*Nuw Isusoo kuk Onísaa tayapstaranguri, na uwsha Isusoo mangoonkiya. (1.10)*

ki: itaru shiysha m'chuchureetsinashtish aranginasha zuwanlleetsish ashiritam chinangcha.

<sup>17</sup>Shiy nuwaa chinakish ashiriya Onísaa nuwaa ashiritam chinangcha. Nuw shiyash kuskachinaareena, ¿ndush mangish shambatchish? Ashiriya, Onís kuskachu, shambatangtamcha. Nuwaa tamapari ashiritam chinangcha. <sup>18</sup>Onís nda shiyaam wanasiri tarawaztarangu, shuchirangi-naariya, nuwsha nuwaana tuwapchinllpa. <sup>19</sup>Nuw Paporu nuwaani kuwipti yandaki; Nuw shiyaam tuwapchinllpa átana. Nuw ngichtareezi. Itaru, shiysha zuwanlee, mbizarinllpa. ¿Chak shiyaa ichtaru Isusoo kuk tayaspataranga? ¿Ndusha nuw shiyaa tayapstarangi? ¿Ashiri shiysha tamaree nuwaam tuwapchish yuwamand tayapstarangi anumanda? <sup>20</sup>Ashiriya, zuwaa, nuwaa kuki mazinangandama. Isusoo chinakush, ashiriya nuwaa kuki tumi-nungcha. Zuwanlee Onísaa natsarinllpa; chinangcha. Nuwaa tuwizpurtanda. Nuw shiyaa Isusumun zuwanlleeruri atina.

<sup>21</sup>Watam nuw shiyaa uru yasakinawa, ashirucha, Nuwaa kuki mazinak-

chu, aranginashaparee ipareetsi Onísa chinachparee aturi, Onísaa mapiyruri zanganchima. Ashiriya, shiysha chinangcha, zuwanllee.

<sup>22</sup>Mishat, táchinllpa. Nuwaam Apanllpat tsiyatangcha nuw tumanshishish shitungamaama. Tsiyatkachush, nuwaa Apanll tashitungachparee. Sheeru, nuw shiyash kuskachuri, shiyash taachinipa. Ashiri zuwanllee, wasina nuwaam taarasheemi yarangandama.

<sup>23</sup>Mishat, zuwanllee Ipáparása Apanllmand kuk tumanarangtamsincha. Na nuwapat nish taariniya. Filemónoo chinaktamana, atiya shiyaatsi. <sup>24</sup>Márkosa, misha Arístárku, misha Tímsa, misha Lukasa ichingurusin nuwash shanee-rana. Apanlltam kuk tayapstakanaya. Ichingurutanda: Shiyaa chinakaniya, atinaya shiyaatsi. <sup>25</sup>Ashiriya, zuwanllee, iy Kurakarini Isusu; Apanll Wipa, siyaam ichinguroomis istachiya.

[Ashiriya, wapparee, zuwaa Filemónu.]